




人事典第四十五卷

稱號部彙考

禮記 曲禮

君大夫之子不敢自稱曰余小子大夫士之子不敢自稱曰嗣子某不敢與世子同名

注列國之

君與天子之大夫其子皆不敢自稱余小子避嗣天子之稱也列國之大夫與士之子不敢自稱嗣子某避嗣諸侯之稱也呂氏曰世子君之適子也諸臣之子不敢與之同名亦避君也若名之在世子之前則世子爲君亦不避穀梁傳曰衛齊惡衛侯惡何爲君臣同名也君子不奪人名不奪人親之所名

儀禮 士相見禮

凡自稱於君士大夫則曰下臣宅者在邦則曰市井之臣在野則曰草茅之臣庶人則曰刺草之臣他國之人則曰外臣

韓詩外傳 論先生

問者曰古之謂知道者曰先生何也猶言先醒也不聞道術之人則冥於得失不知亂之所由耗耗乎其猶醉也故世主有先生者有後生者有不生者昔者楚莊王謀事而居有憂色申公巫臣問曰王何爲有憂也莊王曰吾聞諸侯之德能自取師者王能自取友者霸而與居不若其身者亡以寡人之不肖也諸大夫之論莫有及於寡人是以憂也莊王之德宜君人威服諸侯日猶恐懼思索賢佐此其先生者也昔者宋昭公出亡謂其御曰吾知其所所以亡矣御者曰何哉昭公曰吾被服而立侍御者數十人無不曰吾君麗者也吾發言動事朝臣數百人無不曰吾君聖者也吾外內不見吾過失是以亡也於是改操易行安義行道不出二年而美聞於宋宋人迎而復之諡爲昭此其後生者也昔郭君出郭謂其御者曰吾渴欲飲御者進清酒曰吾饑欲食御者進乾脯梁糗曰何備也御者曰臣儲之曰奚儲之御者曰爲君之出亡而道飢渴也曰子知吾且亡乎御者曰然曰何以不諫也御者曰君喜道諛而惡至言臣欲進諫恐先郭亡是以不諫也郭君作色而怒曰吾所以亡者誠何哉御轉其辭曰君之所以亡者太賢曰夫賢者所以不爲存而亡者何也御曰天下無賢而獨賢是以亡也伏軾而嘆曰嗟乎夫賢人者如此乎於是身倦力解枕御膝而臥御自易以備疎行而去

身死中野爲虎狼所食此其不生者也故先生者當年霸楚莊王是也後生者三年而復宋昭公是也不生者死中野爲虎狼所食郭君是也有先生者有後生者有不生者詩曰聽言則對誦言如醉稱號部藝文

六一居士傳

宋歐陽修

六一居士初謫滁山自號醉翁既老而衰且病將退休於潁水之上則又更號六一居士客有問曰六一何謂也居士曰吾家藏書一萬卷集錄三代以來金石遺文一千卷有琴一張有棋一局而常置酒一壺客曰是謂五一爾奈何居士曰以我一翁老於此五物之間是豈不爲六一乎客笑曰子欲逃名者乎而屢易其號此莊生所謂畏影而走乎日中者也余將見子疾走大喘渴死而名不得逃也居士曰吾固知名之不可逃然亦知夫不必逃也吾爲此名聊以志吾之樂爾客曰其樂如何居士曰吾之樂可勝道哉方其得意於五物也太山在前而不見疾雷破柱而不驚雖響九奏於洞庭之野闔大戰於涿鹿之原未足喻其樂且適也然常患不得極吾樂於其間者世事之爲吾累者衆也其大者有二焉軒裳珪組勞吾形於外憂患思慮勞吾心於內使吾形不病而已瘁心未老而

先衰尙何暇於五物哉雖然吾自乞其身於朝者三年矣一日天子惻然哀之賜其骸骨使得與此五物偕返於田廬庶幾償其夙願焉此吾之所以志也客復笑曰子知軒裳珪組之累其形而不知五物之累其心乎居士曰不然累於彼者已勞矣又多憂累於此者既佚矣幸無患吾其何擇哉於是與客俱起握手大笑曰置之區區不足較也已而嘆曰夫士少而仕老而休蓋有不待七十者矣吾素慕之宜去一也吾嘗用於時矣而訖無稱焉宜去二也壯猶如此今既老且病矣乃以難強之筋骸貪過分之榮祿是將違其素心而自食其言宜去三也吾負三宜去雖無五物其去宜矣復何道哉熙寧三年九月七日六一居士自傳

一日子解

趙儒

予感歲暮乃爲此解冀良久相與砥礪不我棄也

客有問於一日子曰子欲志道胡謂一日也豈不聞道體無外人心易私非道遠人人自遠而雖終身之未逮豈一日之可期一日子曰千里匪遠跬步匪近千鈞匪重鎰銖匪重輕視之如一乃得其情豈不聞志高者易荒名盛者易傾與其悠悠以卒歲孰若竟日而冰兢客曰噫嘻爲山九仞功虧

一簣鑿井未泉猶以爲棄日月逝焉聖門是愧杯水雖勤車薪猶熾如子所云不幾於廢道乎哉一日子曰以昔視今猶今視昔億萬斯年猶之一日苟今日之未力又來日之敢必客曰子之言吾知之矣杯土不讓細流不擇積小高大而無間隙日復一日持久乃益一日子曰是道也先意而爲之吾弗敢也不耕而穫不菑而畲有望斯妄無爲斯爲厥心憧憧是爲自欺客曰子之言得矣盍盡言之日子曰客不聞乎孔子有言一日用力力無不足朝聞乎道夕死可矣一日克復天下歸之吾知有今日不知有來日至於來日視爲今日泰山在前而不見其形震驚在側而不聞其威吾謂一日如是而已客曰聞命矣遂謂一日子云

稱號部紀事一

拾遺記帝嚳之妃鄒屠氏之女也妃嘗夢吞日則生一子凡經八夢則生八子世謂爲八神亦爲八翌翌明也亦謂八英亦謂八力言其神力英明翌成萬象億兆流其神睿焉

史記五帝本紀重華父曰嚳翌嚳翌盲而舜母死按注孔安國曰舜父有目不能分別好惡故時人謂之嚳配字曰叟無目之稱也 高陽氏有才子八人世得其利謂之八愷高辛氏有才子八人

世謂之八元此十六族者世濟其美不隕其名至於堯堯未能舉舜舉八愷使主后土以撥百事莫不時序舉八元使布五教於四方父義母慈兄友弟恭子孝內平外成昔帝鴻氏有不才子掩義隱賊好行凶慝天下謂之渾沌少暉氏有不才子毀信廢忠崇飾惡言天下謂之窮奇顓頊氏有不才子不可教訓不知話言天下謂之檮杌此三族世憂之至于堯堯未能去縉雲氏有不才子貪于飲食冒于貨賄天下謂之饕餮天下惡之比之三凶舜乃流四凶族遷於四裔以御魑魅按注神異經云崑崙西有獸焉其狀如犬長毛四足似熊而無爪有目而不見行不開有兩耳而不聞有人知往有腹無五臟有腹直短食徑過人有德行而往抵角有凶惡而行依憑之名渾沌謹兇性似故號之西北有獸其狀似虎有翼能飛便勦食人知人言語聞人鬪輒食直者聞人忠信輒食其鼻聞人惡逆不善輒殺獸往饋之名曰窮奇共工性似故號之西方荒中有獸焉其狀如虎而大毛長二尺人面虎足猪口牙尾長一丈八尺攪亂荒中名檮杌一名敖狼一名難訓繇性似故號之西南有人焉身多毛上頭戴豕性狠惡好息積財而不用善奪人穀物强者畏羣而單名饕餮三苗性似故號之高士傳巢父者堯時隱人也山居不營世利年老以樹爲巢而寢其上故時人號曰巢父

羣碎錄堯封禹爲夏伯故謂之伯禹

吳越春秋古公卒太伯仲雍歸赴喪畢還荆蠻國民君而事之自號爲勾吳吳人或問何像而爲勾吳太伯曰吾以伯長居國絕嗣者也其當有封者吳仲也故自號勾吳非其方乎

史記齊世家周西伯將出獵卜之曰所獲非龍非虜非虎非熊所獲霸王之輔於是周西伯獵遇太公於渭之陽與語大說曰自吾先君太公曰當有聖人適周周以興子真是邪吾太公望子久矣故號之曰太公望

無能子文王歿武王伐紂滅之伯夷叔齊叩馬諫曰父死不葬而起大事動大衆非孝也爲臣弑君非忠也左右欲兵之武王義而釋之伯夷叔齊乃反隱首陽山號首陽子

左傳隱公元年初鄭武公娶於申曰武姜生莊公及共叔段愛共叔段欲立之亟請於武公公弗許及莊公卽位爲之請制公曰制巖邑也號叔死焉佗邑惟命請京使居之謂之京城太叔
莊公十九年楚子嚭巴人敗于津還鬻拳弗納遂伐黃初鬻拳強諫楚子楚子弗從臨之以兵懼而從之鬻拳曰吾懼君以兵罪莫大焉遂自刎楚人以爲大閹謂之大伯
二十八年晉伐驪戎驪戎男

女以驪姬歸生奚齊驪姬嬖欲立其子賂外嬖梁五與東關嬖五二五卒與驪姬譖羣公子而立奚齊晉人謂之二五耦

史記秦本紀百里傒亡秦走宛楚鄙人執之繆公聞百里傒賢欲重贖之恐楚人不與乃使人謂楚曰吾媵臣百里傒在焉請以五羖羊皮贖之楚人遂許與之當是時百里傒年已七十餘繆公釋其囚與語國事謝曰臣亡國之臣何足問繆公曰虞君不用子故亡非子罪也固問語三日繆公大說授之國政號曰五羖大夫

左傳文公元年楚子欲立王子職而黜太子商臣商臣聞之而未察其師潘崇曰享江芊而勿敬也從之江芊怒曰呼役夫宜君王之欲殺女而立職也告潘崇曰信矣按注呼發聲也役夫賤者稱襄公四年臧紇侵邾敗於狐駘國人誦之曰我君小子朱儒是使朱儒朱儒使我敗於邾按注臧紇短小故曰朱儒

路史李伯陽甫生而能語黃面皓首故謂之老子邑千苦之賴賴乃萊也故又曰老萊子

史記吳太伯世家季札封於延陵故號曰延陵季子

左傳昭公二十八年叔向欲娶于申公巫臣氏其母曰昔有仍氏生女名曰元妻樂正后夔娶之生伯封實有豕心貪惏無厭忿類無期謂之封豕

新序義勇篤楚太子建以費無極之譖見逐建有子曰勝在外子西召勝使治白號曰白公史記越世家范蠡浮海出齊變姓名自謂鴟夷子皮耕於海畔苦身戮力父子治產居無幾何致產數千萬齊人聞其賢以爲相范蠡喟然嘆曰居家則致千金居官則至卿相此布衣之極也久受尊名不祥乃歸相印盡散其財以分與知友鄉黨而懷其重寶間行以去止于陶以爲此天下之中交易有無之路通爲生可以致富矣於是自謂陶朱公

戰國策衛鞅亡魏入秦孝公以爲相封之于商號曰商君

史記樛里子傳樛里子者名疾秦惠王之弟也與惠王異母母韓女也樛里子滑稽多智秦人號曰知囊樛里子疾室在於昭王廟西渭南陰鄉樛里故俗謂之樛里子至漢興長樂宮在其東未央宮在其西武庫正直其墓秦人諺曰力則任鄙智則樛里

虞卿傳虞卿者游說之士也躡蹻擔簦說趙孝成王一見賜黃金百鎰白璧一雙再見爲趙上卿故

古今圖書集成
號爲虞卿

魯仲連傳注正義曰魯連子云齊辯士田巴服狙丘議稷下毀五帝罪三王服五伯離堅白合同異一日服千人有徐劫者其弟子曰魯仲連年十二號千里駒往請田巴曰臣聞堂上不奮郊草不芸白刃交前不救流矢急不暇緩也今楚軍南陽趙伐高唐燕人十萬聊城不去國亡在旦夕先生奈之何若不能者先生之言有似梟鳴出城而人惡之願先生勿復言田巴曰謹聞命矣巴謂徐劫曰先生乃飛兔也豈直千里駒巴終身不談

呂不韋傳秦太子政立爲王尊呂不韋爲相國號稱仲父

荆軻傳荆軻者衛人也其先乃齊人徙于衛衛人謂之慶卿而之燕燕人謂之荆卿

陳涉世家陳勝王凡六月已爲王王陳其故人嘗與傭耕者聞之陳扣宮門曰吾欲見涉宮門令欲縛之自辨數乃置不肯爲通陳王出遮道而呼涉陳王聞之乃召見載與俱歸入宮見殿屋帷帳客曰夥頤涉之爲王沈沈者楚人謂多爲夥故天下傳之夥涉爲王由陳涉始

漢書項籍傳齊使者高陵君顯見楚懷王曰宋義論武信君必敗數日果敗軍未戰先見敗徵可謂

知兵矣王召宋義與計事而說之因以爲上將軍別將皆屬號卿子冠軍

酈食其傳食其好讀書家貧落魄無衣食業爲里監門然吏縣中賢豪不敢役皆謂之狂生

鼂錯傳錯爲太子家令以其辯得幸太子太子家號曰智囊

萬石君傳石奮爲諸侯相長子建次甲次乙次慶皆以馴行孝謹官至二千石於是景帝曰石君及四子皆二千石人臣尊寵迺舉集其門凡號奮爲萬石君

鄧都傳都爲中尉丞相條侯至貴居也而都揖丞相是時民樸畏罪自重而都獨先嚴酷致行法不避貴戚列侯宗室見都側目而視號曰蒼鷹

楚元王傳辟疆子德字路叔少修黃老術有智略少時數言事召見甘泉宮武帝謂之千里駒

東方朔傳帝姑館陶公主號竇太主寡居年五十餘矣近幸董偃偃以主故諸公接之名稱城中號曰董君上從主飲坐未定上曰願謁主人翁主迺下殿之東廂自引董君因叩頭謝上爲之起有詔賜衣冠上偃起走就衣冠主自奉食進觴當是時董君見尊不名稱爲主人翁

李廣傳廣拜右北平太守匈奴號曰漢飛將軍避之數歲不入界

車千秋傳千秋本姓田氏爲相十二年初千秋年老上優之朝見得乘小車入宮殿中故因號曰車丞相

嚴延年傳延年冬月傳屬縣囚會論府上流血數里河南號曰屠伯

翟方進傳永始二年擢方進爲丞相方進知能有餘兼通文法吏事以儒雅緣飾法律號爲通明相天子甚器重之

馮野王傳野王弟立徙西河上郡立居職公廉治行略與野王相似而多知有恩貸好爲條教吏民嘉美野王立相代爲太守歌之曰大馮君小馮君兄弟繼踵相因循聰明賢知惠吏民政如魯衛德化鈞周公康叔猶二君

樓護傳護爲人短小精辨論議常依名節聽之者皆竦與谷永俱爲五侯上客長安號曰谷子雲筆扎樓君卿胥舌言其見信用也母死送葬者致車二三千兩閭里歌之曰五侯治喪樓君卿召信臣傳信臣遷南陽太守治化大行吏民親愛信臣號之曰召父

萬章傳萬章字子夏長安人也長安熾盛街閭各有豪俠章在城西柳市號曰城西萬子夏

陳遵傳遵字孟公所到衣冠懷之唯恐在後時列侯有與遵同姓字者每至人門曰陳孟公坐中莫不震動既至而非因號其人曰陳驚坐云

杜欽傳欽字子夏少好經書家富而目偏盲故不好爲吏茂陵杜鄴與欽同姓字俱以才能稱京師故衣冠謂欽爲盲杜子夏以相別欽惡以疾見詆譎爲小冠高廣財二寸由是京師更謂欽爲小冠杜子夏而鄴爲大冠杜子夏云

貨殖傳宛孔氏之先梁人也用鐵冶爲業秦滅魏遷孔氏南陽大鼓鑄規陂田連騎游諸侯因通商賈之利有游閑公子之名

搜神記鄭弘遷臨淮太守郡民徐憲在喪致哀有白鳩巢戶側弘舉爲孝廉朝廷稱爲白鳩郎寶賓錄有道大人漢李恢廣武君左車十四世孫高尚不仕號有道大人

珍珠船漢雍仲進南海香拜洛陽尉時號香尉

後漢書馮勤傳勤字偉伯魏郡繁陽人也曾祖父揚宣帝時爲弘農太守有八子皆爲二千石趙魏間榮之號曰萬石君焉

魯恭傳恭祖父匡王莽時爲義和有權數號曰智囊

戴良傳良字叔鸞汝南慎陽人也曾祖父遵字子高平帝時爲侍御史王莽篡位稱病歸鄉里家富好給施尙俠氣食客嘗三四百人時人爲之語曰關東大豪戴子高

劉盆子傳瑯邪人樊崇起兵於莒自號三老初崇等以困窮爲寇無攻城徇地之計衆既寢盛乃相與爲約其中最尊者號三老次從事次卒吏汎相稱曰臣人王莽遣平均公廉丹太師王匡擊之崇等欲戰恐其衆與莽兵亂乃皆朱其眉以相識別由是號曰赤眉赤眉大破丹匡軍遂立盆子爲帝初赤眉過式掠盆子及二兄恭茂皆在軍中恭隨崇降更始盆子與茂留軍中屬右校卒吏劉俠卿主芻牧牛號曰牛吏

馮異傳異爲人謙退不伐行與諸將相逢輒引車避道進止皆有表識軍中號爲整齊每所止舍諸將並坐論功異常獨屏樹下軍中號曰大樹將軍

任延傳延字長孫南陽宛人也年十二爲諸生學於長安明詩易春秋顯名太學學中號爲任聖童張湛傳湛拜光祿勳光武臨朝或有惰容湛輒陳諫其失常乘白馬帝每見湛輒言白馬生且復諫

矣湛拜大中大夫居中東門侯舍故時人號曰中東門君

井丹傳丹字大春扶風郿人也少受業太學通五經善談論故京師爲之語曰五經紛綸井大春戴憑傳憑拜虎賁中郎將以待中兼領之正旦朝賀百僚畢會帝令羣臣能說經者更相難詰義有不通輒奪其席以益通者憑遂重坐五十餘席故京師爲之語曰經解不窮戴侍中

逢萌傳萌與同郡徐房平原李子雲王君公相友善並曉陰陽壞德穢行房與子雲養徒各千人君公遭亂獨不去僮牛自隱時人謂之論曰避世牆東王君公

郭憲傳憲字子橫時匈奴數犯塞帝患之乃召百僚廷議憲以爲天下疲敝不宜動衆諫爭不合乃伏地稱眩瞽不復言帝令兩郎扶下殿憲亦不拜帝曰常聞關東鮐鮐郭子橫竟不虛也

伏湛傳湛琅邪東武人也九世祖勝字子賤所謂濟南伏生者也自伏生已後世傳經學清靜無競故東州號爲伏不鬪云

杜詩傳詩建武七年遷南陽太守性節儉而政治清平以誅暴立威善於計略省愛民役造作水排鑄爲農器用力少見功多百姓便之又修治陂池廣拓土田郡內比室殷足時人方於召信臣故南

陽爲之語曰前有召父後有杜母

江革傳革客下邳窮貧裸跣行傭以供母便身之物莫不必給建武末年與母歸鄉里每至歲時縣當案比革以母老不欲搖動自在轅中輓車不用牛馬由是鄉里稱之曰江巨孝

馬嚴傳嚴字威卿弟敦字孺卿亦知名援卒後嚴乃與敦俱歸安陵居鉅下三輔稱其義行號曰鉅下二卿

黃香傳香字文疆江夏安陸人也年九歲失母思慕憔悴殆不免喪鄉人稱其至孝年十二太守劉護聞而召之署門下孝子甚見愛敬香家貧內無僕妾躬執辛勤盡心奉養遂博學經典究精道術能文章京師號曰天下無雙江夏黃童初除郎中元和元年肅宗詔香詣東觀讀所未嘗見書香後告休及歸京師時千乘王冠帝會中山邸乃詔香殿下顧謂諸王曰此天下無雙江夏黃童者也左右莫不改觀

楊政傳政字子行京兆人也少好學從代郡范升受梁丘易善說經書京師爲之語曰說經鏗鏘楊子行